


Bouxbangfuz



武宣县桐岭镇新龙小学五(1)班 Vangz Cwngzlang/黄程浪


De dwg bouxbangfuz ranz gou, de vunz gyaueu, simsoh youh ndeigangj, mingzcoh de heuhguh Mwz ahyiz.

Geiq ndaej de mbat daih'it daeuj ranz gou, gou yawj de cungj ngaenz lo: Cij raen de byoem youh raez youh ndaem, fouq lwgda luenzlulu lumj naedcaw, baez riu hwnjdaej gwnz naj loh'ok song aen cenj, giuzndaeng de youh hung youh sang, gyaueu raixcaix. Seizhaenx gou ndawsim gag ngeix, de baenzneix gyaueu, ranz gou youh yienghneix gungz, de yawj ndaej hwnj ranz gou lwi? Hoeng gij ngeixfap gou loek lo.

Baez haenx, ndaw fuzbinzban heuh dou daij daxmeh gou bae yienhsingz Aisinh Ganghfuz Yihyen genjcaz aeu caizliu banh yozcicwng. Gou caeuq daxboh cingq lauhei q mbouj rox baenzlawz daij daxmeh gou bae naenghci, couh youq ngoenz haenx haetcaeux, Mwz ahyiz couh bau aen ci ndeu heuh vunz daeuj ranz gou ciep dou, de hix daj danhvei de ganj bae yihyen. Daengz yihyen seiz cijraen vunzlai lumj gwnz haw, seizneix dou ra mbouj raen Mwz ahyiz, ndawsim cingq gip dwk lumj duzmoed youq ndaw rekndat. Cingq youq seizneix bouxbangfuz Mwz ahyi couh daengz henz dou lo, de heuh dou naengh youq henz ci, de bae bang dou banh, hoeng,

daxmeh gou cij daij miz mbaw siengq conq ndeu, mbouj dwg song conq, Mwz ahyi youh gipmuengz bang daxmeh gou ingj siengq, yienzhaeuh song din lumj dawz feiz nei dawz bae bang yaenq. Cib faen, ngeihcib faen.....Seizgan lumj laeuhsa menhmenh laeuh okbae, cigdaengz gvaq buenq aen cungdaeu le, dauqndaej raen Mwz ahyiz gaenjgip byaij daeuj coh dou. Seizneix, daengngoenz haenq lumj feiz, cij raen de mienh uet hanh mienh lumj buet nei byaij daeuj coh dou. Daengz gyawj le, raen gwnz fwngz de lij riu miz daeh lwgmak he, daengz henz ndang gou, de couh ndenq hawj dou gwn. Seizneix dou dungx cingq iekngaungau, de caen lumj boux mbwn doek siet seiz hawj vunz soengq danq ha! Gou yawj ndang saeq de baiz youq aen doih raezrangrang haenx, ndawsim gangj mbouj ndaej ok gijmaz feihdauh, gvaq le haujlai nanz, dauqndaej banh ndaej lo.

Dou naeuz aeu dauqma seiz, Mwz ahyiz youh daj aendaehbeq de dawz song bak maenz ngaenz mienh ndenq hawj gou mienh gangj: "Siuj baengz-youx mwngz aeu ciuqgoq ndei daxmeh mwngz, aeu nyinhcaen doegsaw, gij ngaenz neix dwg hawj mwngz doegsaw yungh....." Gou lienzmuengz vad fwngz gangj: "Mbouj yungh, mbouj yungh, docih mwngz." Hoeng de nyengh dawz ngaenz oet hawj



gou, seizhaenx gou raemxda doek lo, lwgda mbouj gamj yawj de, gou lau langh yawj de le gou couh daej ok sing daeuj.

Gou gig docih bouxbangfuz Mwz ahyiz, caj gou majhung le, hix lumj de ityiengh bae bangcoengh bouxwnq.

(lauxsae son'gyauq: Lungz Gingyi/龙庆煜)

Baez Vueddoengh Hojlumz Ndeu

上林县大丰镇中心学校四(2)班 Veiz Yinhdungz/韦欣彤



Ngoenz singgeizit rumz ndei mbwn gvengq. Lauxsae byaij hauej gyausiz naeuz: "Gyoengq doengzhag, yozyau raeuz ngoenzcog cujiz bae gunghyenz youz, cingj daihgya baema ranz bwh ndei." "Yo!" Ndw gyausiz couh yiengi sing'angq singhemq goksasa.

Ma ranz le, gou bwh ndei baenz doi doxgaiq bae: Gojloz, gepmaenz, gyauj-gwzliz, gojdzung.....cungj dwg bwh ce ngoenzlaeng lijyouz, gou angqyangz raixcaix.

Ngoenzdaihngaih, gou caeux couh ndiu lo, aemq hwnj doxgaiq ndeigwn haenx, angqvauvau bae hagdangz. Daeuj daengz hagdangz le, va, gyoengq doengz-hag daij daeuj gij ndeigwn caen lai ha! Gak cungj gak yiengh, miz rang miz

manh, geq mbouj rox liux. Gou siengj, baez neix ndaej gwn gaeuq bae lo.

Dou hwnj le cicunghbah, lauxsae diemj soqvunz, gangj le ancienz gveihcwz caeuq hozdung gonqlaeng, liuxle couh hwnjdin lo.

Dou daeuj daengz gunghyenz, sien bae aen daemzbyagim gueng bya, baenz duz baenz duz byagim haenx, daenj "ndangdaenj" ronghsien, hoengz, henj, hau, ndaem, heu, gak cungj gak yiengh. Cuengq liuh roengzbae, gyoengqde dox-canj gwn, fat ok sing sisi soso, sinz hwnj baenz duj baenz duj varaemx, ndit ciuq gyaetbya myigmyagmyag. Raen byagim gwn ndaej baenzneix rang, gou hix ndwnj myaiz lo.

Dou youh bae suenva yawj va. Gizneix va gig lai, gak cungj gak yiengh, lai dangqmaz bae, saek mbouj dox-doengz, homfwtfwt, hawj vunz yawj le sim'angq dangqmaz, haujlai bouxyouz ingjsiengq louzniemh.

Banringz seizgan daengz lo, gyoengq doengzhag baenz gyoengq baenz bang naengh youq laj faex, gwn doxgaiq diemzsubsub. Gou gwn ndaej gig diemz, raen habhoz raixcaix.

Yaek baema ranz lo, ingj siengq ba, "gahcah!" dou youq ndaw gunghyenz ce gij ndangngaueuz dou angqyangz haenx, dawz gij simcingz gyaundeiz dauqbae. Maqmuengh baezlaeng dauqdauej moq.

(lauxsae son'gyauq: Mungz Cwngzgen/蒙成建)



Namhboengz

Baezbaez gou aeu namhboengz nyaenj baenz lailai aen bingjluenziq, baezbaez gou aeu lailai naed ngveihmaknganx ndaem youq diegbingz baihnaj ranz, beixmbauq ha, mwngz vihmaz cungj baksoem naeuz gou "namhboengz rim fwngz, gyuek lai, dwgcaengz lai" ne?

Daxau youq ndaw yiuqvax laj bya doiqnaj de, ngoenzngoengz aeu namhboengz fad baenz lailai ndaek cien daeuj caep ranz, guh baenz lailai gep vax daeuj goemq ranz, fwngz gyoengqde goj nem rim namhboengz. Gyoengq daxau goj gyuek lai, dwgcaengz lai ma, beixmbauq ha?

Bohmeh ngoenzngoengz bae gwnz bya ndaem yw, song fwngz ciengzseiz gyuek namhboengz. Mwngz goj haemz bohmeh, naeuz bohmeh gyuek ma, beixmbauq ha?

Gij mbu youh van youh byot de, gij lwgcid baenzgwn dahraix de, cungj dwg ndaem youq ndaw namhboengz. Mwngz goj raen mbu caeuq lwgcid youh gyuek youh dwgcaengz ma, beixmbauq ha?

Mwngz langhgyaj youq ranz seizde, bae coengh bohlungz vat lwgheuj, buhvaq mwngz caeuq gwnz naj mwngz cungj gyuek namhboengz liux. Nyaenx gou cix guhlawz naeuz mwngz ne? Beixmbauq ha!

(Daj 《Bonjsei Sim Lwngnyez》(Veiz Gizlinz raiz) senj okdauej, Lwgfwngzmeih/卢奋长 hoiz)